

編號 1 號

【簡單个幸福】徐姿華原作

打早，涼涼微風並柔柔天光，掀開間房个白紗窗門布，摺正對甜甜夢肚醒來个僵攢手；難得个放棄日，懶在眠床看日頭輕輕徒步、聽窗門外鳥聲吱啁，時間也像恬恬頓腳咧，啊！這靚靚个朝晨。

食飽朝，想去尋久無見面个朋友遠寮。自家駛車，時間扼在自家个手頭町，做得慢慢仔行、定定仔寮；經過鬧熱个街路，車輪仔轉落鄉道，來到苗栗个穀倉——灣裡。路兩片金黃飽米个禾串強強會對田肚渌出來；風吹來，一陣一陣歡喜到手攘腳踏、搖頭扭腰个金黃稻浪，分人心情暢快。田脢企等兩個在該比手畫腳个阿伯，日頭晟來，笠嬬下晒到烏刻刻个面町，單淨看著兩排雪白个牙齒，想來應該當滿意今年係好年冬咧！

幹過一隻大彎幹，共樣係闊野野个田地，直直透到山下；深深淺淺个黃襯等青青个田、綠綠个大樹，像係天公伯个調色盤，也係這隻豐收季節正有个景色。該向有幾夫既經割忒早冬禾，準備愛過蒔二冬禾个田，田水鮮鮮，將朗朗个藍天摺白雲、田脢个樹仔摺人家个屋，清清楚楚反映出來，斯像框在用田塍做相框裡

肚个相片，實在還靚。這向堵好有一夫田當在該割禾，紅色个割禾機在田肚緊行緊割，三、四個人在脢頭搨手，無閒直掣；割禾機背後跔歸陣白鶴，有兜低頭絡食、有兜大步行尋食、有兜飛高飛低搶食，鬧熱煎煎，這斯係田肚最有生命力个畫面咧！

車仔慢慢仔溜落莊頭，伏在路脢个老狗牯看著車仔來，伸懶筋企起來拂尾，像迎接老朋友樣。一個著花衫个伯姆站在屋面前个菜園摘菜，菜園分屋蔭等、日頭旨有晒著，青里里个菜葉面還有露水，看起來當萋、當錫人食。兩個國小年紀个細阿哥仔，一儕慢慢仔箭自行車、一儕半行半走、手町還拗等籃球，嘻嘻哈哈有講有笑愛共下去打球仔。這一路个光景，實在分人心情鬆爽。

主人準備好一桌點心、地豆摺瓜子，還有清香个高山烏龍茶，三、四個當久無見面个老朋友，天南地北講到毋知天合地。茶香、情醺，靚靚个日仔、靚靚个心情，這斯係簡單个幸福。

編號 2 號

【陂塘】許倩雯原作

用鏡頭記錄臺灣這遍土地个導演齊柏林，坐在直升機頂對天頂看往下，形容桃園个陂塘就像係「散落一地泥个水晶，金若若仔¹！」

兩隻白鶴一前一後在陂塘面頂飛過，白雪雪个身影倒映在平靜个水面。水蓮花²對青青个水肚探出頭，細細蕊个黃花就像天頂緊瞞緊瞞个星仔，靚到耐毋得。

立秋正過啊忒，陂塘就飛來一群準備愛過冬个人客！鬥腳鳥³水紅色个長腳，踩在淺水个位所定仔行，鳥觜在水竇肚掃來掃去，無閒在該尋食。花刺花刺个細水鴨撈頭那汨落水肚，屎肫翹到半天高。忽然間，一粒扁扁个石頭飛啊過來，嚇到這群鳥仔被翼飛起。原來係陂塘脣，走來一群細亞仔在該打水漂仔。坐在樹下擎等釣槓个男仔人，大聲罵：「有人在這釣魚仔，你兜孤盲頭在該變麼个齣事，毋好來這搞！」

月光蹶上天頂，在水撈地个合界，白鶴花⁴个清香跔等夜風散開來。夜呱仔⁵醒咧，昏哆昏哆仔⁶喊幾聲「嘎！嘎！嘎！」像烏鈕仔恁大个蛎蠕仔扭等尾泗水，脰身既經生出四支腳咧，在陂塘角尋位所上岸。蛇哥發現在水肚跳出來个烏影，黏時對草竇趁啊出來，開始追佢兜！

有人撈桃園喊做「千陂之鄉」，這肚底像碗公樣，大大細細个陂塘，全部係人工挖出來个。先民在開墾个過程肚盡艱苦，高不將挖陂塘來頓水蔭田。陂塘最多个時節，有萬過隻，也變成桃園當特殊个地理景色。每一隻陂塘都有自家个故事，當多人第一擺泗水、第一擺釣魚仔，都係在陂塘肚發生。

年堵年，跔等時代个流轉，桃園都市化个程度緊來緊高。有兜陂塘失忒蔭水个功能，一隻一隻分人屯忒，起做機場、學校，抑係公園咧。伸下來个陂塘，經過整頓，嘎有了新生命个延續，變成現代人休閒遛奈个好所在！

¹ 金若若仔：音 gim` na` na` er；金光閃閃。

² 水蓮花：音 shui` lien fa`；臺灣萍蓬草。

³ 鬥腳鳥：音 deu` giog diau`；高蹺鴿。

⁴ 白鶴花：音 pag` hog` fa`；野薑花。

⁵ 夜呱仔：音 rha` gua er；夜鷺。

⁶ 昏哆昏哆仔：音 fun de fun de er；頭暈腦脹的。

編號 3 號

【幸福个味緒】黃美貞原作

老古人言：「食了五月粽，被骨正上棟。」五月節正過忒，當晝開始天時就熱到佇毋著，該時堵好係梅雨季節，落過水、起風咧，將就摻冷氣關忒，行到窗門脣感受熱天難得个涼風。除忒幸運看著天邊靚靚个七彩虹，還鼻得著馬膠路¹分日頭煎過、分雨水打過以後淡淡、香香个味道，臨暗頭窗門外背一陣一陣「搥搥搥——搥搥搥——」个蟬仔聲跔等清風傳落屋肚來。

佢想起還細時節，熱燂燂个下晝頭，佢這兜姊妹會摻隔壁鄰舍个細人仔伴共下搞，長下搞到斷烏，聽著阿姆開聲喊：「好轉來洗手食飯咧！」正盼得轉屋。

佢爸係客運司機，平常時愛輪班，所以總係暗晡頭八、九點正下班。當記得係堵好該日無伸麼个飯菜，佢爸會自家煮麵食。逐擺佢就先摻蒜頭礪礪仔剝到幼幼、滷一息豆油還過香油在碗公肚，續等摻煮好个麵撈起來，水泌燥倒在碗公肚，摻蒜頭、配頭共下攪分佢勻，該兩時係聽著佢爸問：「有麼人愛食麵無？」佢這兜就當暢，遽遽飄落灶下，你一口、佢一口，又賺著一餐香噴

噴个宵夜，食到飽飽仔，還幸福哪！佢爸摻个飯菜間等伸無幾多條个麵，儘採划落肚，就恁樣過一餐。

又還記得，熱天臨暗仔洗好身腳，等到食飽夜檢拏好、寫好作業、看一下電視，細人仔還細又好搞，差毋多到愛上眠床該下，又一身汗咧。頭擺屋下無恁好額，斯有一隻間房安有冷氣定定。阿姆會在睡目前半點鐘摻冷氣搏開來，等到大家愛睡該下，間房門打啊開來，斯有涼沁沁个冷氣吹來，歸屋人一下仔就睡落覺咧。

這幸福个滋味一直園在佢个心肝肚，毋多知仔成人長大、做人阿姆以後，正知「賺錢可比針挑筊，使錢可比水推沙。」乜正體會爺哀頭擺辛苦畜大佢這兜細人仔，還過愛理一隻家哪有恁該？毋過該愛盡个責任摻義務，佢兜從來都毋識放忒過。

¹ 馬膠路：音 ma ga lu⁺；柏油路。

編號 4 號

【頭回蹶大山】范振新原作

「避暑來去蹶百岳，愛無？」斯因為這句話，偌三兄弟斯跔等滿叔，共下去蹶人生个第一座大山。該兩時，偌還毋知蹶恁樣个高山有麼个特別，乜毋了解蹶三千米以上个山愛知得哪兜孔竅，偌這從細戴山肚个半桶水，還話著撈頭擺蹶个五指山、石門山這兜淺山仔爭七毋爭八¹，無頭無腦斯想跔等去，正經係細和尚仔唸金剛經——毋知頭又毋知尾。

記得該擺蹶个係池有山撈品田山，滿叔安排兩日兩夜。頭暗晡偌兜先歇在武陵農場，第二日打早六點就出發，按算斷烏前行到新達營地。頭下碼正開始蹶該下，偌話著自家个體力當好，平常乜有運動个習慣，所以行盡遽，想愛早一息蹶上山頭。無胚著，正行點零鐘斯佇毋著，歸身汗流脈落，強強會故氣毋出。

偌試著盡奇怪，這擺愛蹶山以前，偌還跔工逐日去運動坪練習，仰會還係恁恂？背尾正知，係因為山頂个氧氣較少，又愛背食糧、滾水、襖婆這兜，加加起來完²十公斤个東西，身體需要還較多个能量，正會行一細節就故大氣。該載，老弟乜撈偌共樣，

佢緊故大氣緊問滿叔：「會到旨？還有幾遠？」滿叔笑笑仔應講：「還旨得時哦，登山口就還旨到！加油！」聽著滿叔恁樣講，偌正經愛嗽無目汁，高不將撈自家个包袱攞起來刻耐仔續等行往上。滿叔又講：「毋好行恁遽，山又毋會走忒，定定仔行斯好，恂咧就頓恬下來歇睏，山頂个風景當靚哦！」

斷真，山頂个路彎彎幹幹，毋過見轉一隻彎斯有新个天地，在山肚滿哪仔都係好風光，尤其係對面个群山，在半山排遠遠看過，一遍青里里，加勝青天撈白雲不時變化，每一分鐘、每一秒都像係無共樣个風景明信片。歸路還有鳥仔、蟲仔在該唧唧唧，偌斯在這大自然个音樂會裡肚，一頭享受山頂个美景；一頭手爬腳蹶繼續行。三不二時還做得看著鷓鴣在天頂飛來飛去，感覺當自在、當自由。就在偌看到慧神發琢呆个時節，忽然間聽著阿哥大嫲牯聲喊：「噯！看著三角點囉！」偌煞煞三步做兩步走等上。等蹶到山嶺頂，心肝肚个感動，害偌目汁險險流出來。

到該下偌正知，蹶山恁錫人个原因。

¹ 爭七毋爭八：音 zang` cid m zang` bad；差不多。

² 完：音 von；全部。

編號 5 號

【特別个水煎包】曾俊鑾原作

水煎包這種傳統點心滿哪仔都看得著，臺灣个水煎包大體係包高麗菜个，毋過當好運，偌在學校食過一種特別个水煎包。

下晝三點過後日頭轉影¹，天時較涼咧，下課同學會湊等去打籃球，成下仔會看著，一個背病病个外省老阿伯企在側角。佢捕一隻籃仔，當像驚人知樣，把守一隻無法度講个秘密，佢出現个時節總係看東看西，等偌兜行前去，正細心細意掀開蒙在籃仔頂背个布仔，係一籃正起鑊無幾久還燒燒个水煎包。

偌兜當當在該轉骨²，做儘係飯豚仔³，到下晝早就枵到肚屎憑背囊咧，逐儕歡喜廩天撈錢相爭愛買。該無帶錢又想愛食个人愛仰結煞正好呢？佢兜會講：「這擺你先請，下二擺換偌請你，好無？」兩下半，本成疊到錐錐个水煎包就分人拿忒兩三層。

水煎包下背墊張紙，偌兜連洗手都懶，五隻手指頭托等，擘開嘴就齧⁴落去，當像毋會燒人樣，緊呵緊講：「好食！好食！」

水煎包有較赤⁵兜，老阿伯盡周到，既經薄薄仔先掌過辣油，佢个水煎包係正宗上海、蘇州个江南口味，用豬肉做心，摻等雞卵、蔥仔、香油、鹽這兜配料，係講你个嘴罈精，你還食得出有搵到綿綿个薑嫲，毋敢食辣个同學，乜試著好食。

偌兜緊食緊摻隔壁球場个人攞手，摻食到伸半隻个水煎包拿到高高，招佢兜愛買就愛遽兜，機會難得，過忒這擺，下二擺毋知愛等到哪時。結果，佢兜做儘分好食个水煎包錫⁶錫過來，連平常較有規矩个細妹仔乜湊陣走等過來，老阿伯个嘴角慢慢仔有一息仔笑。

毋過，一陣嘩嘩仔聲就像風時水⁷，摻這場正開始鬧熱个生理打到浪浪散，高中部个教官行過來咧，佢平常就無麼个笑容，這下還較面逼逼，大自家走到尾瀉屎，外省老阿伯乜摻籃仔攞起來，恬恬行往出，對哪搭仔出現，就對哪搭仔毋見忒去。

單淨水煎包个味緒還留在嘴肚。

¹ 日頭轉影：音 ngid teu zhon' rhang'；日影偏斜。

² 轉骨：音 zhon' gud；青春期長高的意思。

³ 飯豚仔：音 fon' tun er；喻發育中的青少年食量很大。

⁴ 齧：音 sen；咬。

⁵ 赤：音 chag；黃褐色，喻煎得表皮焦黃。

⁶ 錫：音 sia；吸引。

⁷ 風時水：音 fung' shi shui'；西北雨。